



www.qbz.gov.al

FLETORJA ZYRTARE E REPUBLIKËS SË SHQIPËRISË

Botim i Qendrës së Botimeve Zyrtare

Viti: 2023 – Numri: 190

Tiranë – E mërkurë, 27 dhjetor 2023

PËRMBAJTJA

	Faqe
Vendim i Këshillit të Ministrave nr. 765, datë 20.12.2023	Për disa shtesa dhe ndryshime në vendimin nr. 189, datë 15.3.2017, të Këshillit të Ministrave, “Për trajtimin me ushqim të punonjësve të Policisë së Shtetit, të studentëve dhe kursantëve në institucionet arsimore të Policisë së Shtetit, si dhe të shtetasve të ndaluar ose të arrestuar, deri në sqarimin e pozitës së tyre”..... 22537
Vendim i Këshillit të Ministrave nr. 769, datë 26.12.2023	Për një shtesë fondi nga fondi rezervë në buxhetin e vitit 2023, miratuar për Agjencinë për Dialog dhe Bashkëqeverisje..... 22538



VENDIM

Nr. 765, datë 20.12.2023

**PËR DISA SHTESA DHE NDRYSHIME
NË VENDIMIN NR. 189, DATË 15.3.2017,
TË KËSHILLIT TË MINISTRAVE, “PËR
TRAJTIMIN ME USHQIM TË
PUNONJËSVE TË POLICISË SË
SHTETIT, TË STUDENTËVE DHE
KURSANTËVE NË INSTITUCIONET
ARSIMORE TË POLICISË SË SHTETIT, SI
DHE TË SHTETASVE TË NDALUAR OSE
TË ARRESTUAR, DERI NË SQARIMIN E
POZITËS SË TYRE”**

Në mbështetje të nenit 100 të Kushtetutës dhe të shkronjës “c”, të nenit 67, të ligjit nr. 108/2014, “Për Policinë e Shtetit”, të ndryshuar, me propozimin e ministrit të Brendshëm, Këshilli i Ministrave

VENDOSI:

I. Në vendimin nr. 189, datë 15.3.2017, të Këshillit të Ministrave, “Për trajtimin me ushqim të punonjësve të Policisë së Shtetit, të studentëve dhe kursantëve në institucionet arsimore të Policisë së Shtetit, si dhe të shtetasve të ndaluar ose të arrestuar, deri në sqarimin e pozitës së tyre”, bëhen këto shtesa dhe ndryshime:

1. Në pikën 1 bëhen ndryshimet dhe shtesa e mëposhtme:

a) Në fillim të pikës 1, fjalët “Trajtohen me ushqim, pa pagesë, strukturat e Policisë së Shtetit, si më poshtë:” zëvendësohen me “Të drejtën e përfitimit të trajtimit me ushqim e gëzojnë strukturat, si më poshtë:”;

b) Shkronja “a” ndryshohet, si më poshtë vijon:

“a) Punonjësit e Policisë së Shtetit:

i. me një vakt “drekë”, kur kohëzgjatja e punës është 8 (tetë) orë;

ii. me tri vakte, kur punonjësi është i angazhuar në gatishmëri, në shërbime për ruajtjen e rendit, sigurimin dhe mbarëvajtjen e procesit zgjedhor, për përballimin e situatave emergjente dhe të fatkeqësive natyrore, aktivitete të ndryshme apo tubime, kur kohëzgjatja e punës është më shumë se koha normale e punës prej 8 (tetë) orësh.”;

c) Pas shkronjës “c” shtohet shkronja “ç”, me këtë përmbajtje:

“ç) Punonjësit e Qendrës së Edukimit Fizik dhe Sporteve Elitare, në Akademinë e Sigurisë, trajtohen me tri vakte ushqim pa pagesë.”.

2. Pika 3 ndryshohet, si më poshtë vijon:

“3. Përfitimi i trajtimit me ushqim bëhet i gatuar në mensa ose, kur nuk është e mundur, jepet në formën e një kompensimi financiar, sipas rregullave të përcaktuara në pikën 4, të këtij vendimi.”.

3. Pika 4 ndryshohet, si më poshtë vijon:

“4. Shuma e kompensimit financiar transferohet në një llogari të posaçme bankare, të hapur nga punonjësi, në bankat e nivelit të dytë, e cila ka si qëllim përdorimin vetëm për trajtimin me ushqim të punonjësve të Policisë së Shtetit, sipas rregullave të kësaj pike. Llogaria e posaçme bankare mund të përdoret vetëm nëpërmjet një karte të posaçme që lejon kryerjen e transaksioneve bankare vetëm në njësi tregtare ushqimore ose rrjete të tyre. Rregullat dhe procedurat për përdorimin e kartës së posaçme në njësitë tregtare ushqimore ose rrjetet e tyre përcaktohen me udhëzim të ministrit të Brendshëm.”.

4. Pas pikës 4 shtohen pikat 4/1 dhe 4/2, me këtë përmbajtje:

“4/1 Masa e vlerës për kompensimin në lekë për çdo normë të trajtimit me ushqim është për:

a) normën ditore të ushqimit me një vakt “drekë”, në vlerën 450 (katërqind e pesëdhjetë) lekë;

b) normën ditore të ushqimit me tri vakte, në vlerën 840 (tetëqind e dyzet) lekë.

4/2 Vlerat e kompensimit në lekë të normave ditore të ushqimit, të përcaktuara në shkronjat “a” dhe “b”, të pikës 4/1, të këtij vendimi, rriten me të njëjtën masë, si dhe masa e indeksimit të pagave të të punësuarve në institucionet e administratës publike, sipas vendimit përkatës të Këshillit të Ministrave.”.

5. Pas pikës 5 shtohet pika 5/1, me këtë përmbajtje:

“5/1 Përrjashtimisht për vitin 2023, shuma e kompensimit financiar, të përcaktuar në pikën 4/1, të këtij vendimi, transferohet në llogarinë bankare të pagës për të gjithë punonjësit e Policisë së Shtetit, që përfitojnë kompensimin financiar.”.

II. Efekti financiar për vitin 2023 mbulohet nga buxheti i Ministrisë së Brendshme.

III. Ngarkohen Ministria e Brendshme, Ministria e Financave dhe Ekonomisë dhe Drejtoria e Përgjithshme e Policisë së Shtetit për zbatimin e këtij vendimi.



Ky vendim hyn në fuqi pas botimit në Fletoren Zyrtare dhe i shtrin efektet nga data 1 janar 2023.

KRYEMINISTËR
Edi Rama

VENDIM
Nr. 769, datë 26.12.2023

**PËR NJË SHITESË FONDI NGA FONDI
REZERVË NË BUXHETIN E VITIT 2023,
MIRATUAR PËR AGJENCINË PËR
DIALOG DHE BASHKËQEVERISJE**

Në mbështetje të nenit 100 të Kushtetutës dhe të neneve 5 e 45, të ligjit nr. 9936, datë 26.6.2008, “Për menaxhimin e sistemit buxhetor në Republikën e Shqipërisë”, të ndryshuar, me propozimin e ministrit të Financave dhe Ekonomisë, Këshilli i Ministrave

VENDOSI:

1. Agjencisë për Dialog dhe Bashkëqeverisje, në buxhetin e miratuar për vitin 2023, në llogarinë ekonomike 604 “Transferta korente të brendshme”, i shtohet fondi prej 43 500 000 (dyzet e tre milionë e pesëqind mijë) lekësh për financimin e programit të “Këshillimit Kombëtar”, në përputhje me legjislacionin dhe kuadrin rregullator në fuqi.

2. Agjencia për Dialog dhe Bashkëqeverisje është institucioni përgjegjës për zhvillimin dhe monitorimin e programit, në bashkëpunim me çdo institucion publik tjetër të nevojshëm, sipas marrëveshjes së bashkëpunimit ndërinstitucional që lidhet midis tyre për kryerjen e fazave specifike të procesit.

3. Efekti financiar sipas pikës 1 përballohet nga fondi rezervë i buxhetit të shtetit, i miratuar për vitin 2023.

4. Ngarkohen Ministria e Financave dhe Ekonomisë dhe Agjencia për Dialog dhe Bashkëqeverisje për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTËR
Edi Rama

*Shënim: Ky dokument është gjeneruar dhe vulosur me anë
të një procedure automatike nga një sistem elektronik
(Qendra e Botimeve Zyrtare)*

	Formati 61x86/8
--	-----------------

Shtypshkronja e Qendrës së Botimeve Zyrtare
Tiranë, 2023

Adresa: Rr. “Nikolla Jorga”, Tiranë
Tel./fax: +355 4 24 27 004 Tel.: +355 4 24 27 006

Çmimi 32 lekë